

Soniwyd eisoes fod Elis yn nai ac etifedd i 'John ap David ap Rice' o Romant mewn achos yn llys y Siawnsri tua 1533-8,² ac mai'r un achos oedd gan Elis dan sylw yn ei ragymadrodd i'r *Croniel* yn llsgr. Mostyn 158. Yn yr un llys, rhwng 1547 a 1551 ymladdwyd dau achos, un gan John ap David ap Rice, a'r llall gan ei frawd Robert ap David ap Rice, ynglŷn â thiroedd eu tad yn nhref Gronant.³ Enwir eu gwrthwynebwyr, ond yr hyn sy'n ddiddorol yw mai asgwrn y gynnen oedd fod John wedi gosod ei diroedd yn adnau neu'n fach i Byrs Mwtwn. Yn erbyn Prys Mwtwn a'i deulu yr oedd Elis yn gobcethio, pe cai gyfle i ddod i Gymru o Galais, ymladd ei achos ef. Dyna a ddywed ef yn ei ragymadrodd a sgrifennwyd tua 1552.

Mae'n debyg, felly, fod John Davith nid yn unig yn ewythr i Elis, ond ei fod hefyd yn was pwysig iawn i Syr Robert. Mae'n eithaf tebyg mai ef a ddenodd Elis i Loegr gyntaf i wasanaethu Syr Robert, ond ni wyddom paham yr oedd John yn y lle cyntaf yn ei wasanaethu.

Abertawe

PRYS MORGAN

arianfys; efyddfys; goldfinger

WRTH drafod enwau'r bysedd mewn nodyn yn PKM. 176-7, awgrymodd Syr Ifor Williams y 'dylid gwrthod *arianfys* 'ring-finger' A.L. i. 624' yng ngoleuni'r ffurf *garanfys* yn RM 155. Mae'r awgrym yn gywir: 'kyn reuet ac aranyys' yw darlenniad llsgr. *U* (Peniarth 37, 4, 7), sy'n sail i destun AL, ac *aranfys* sydd yn WML. 3, 2, o llsgr. *V* (Hartl. 4353); ac ni roir *arianfys* yn GPC. Ond mae *arianfys* yn digwydd mewn cymal cyfreithiol arall, nas argraffwyd yn AL, hyd y gwelais i, er ei fod yn LW. 449 ac mewn llawys-grifau a ddefnyddiwyd at AL. Enwir gwahanol fyseidd mewn gwahanol lawysgrifau; dyma'r rheol fel y rhoir hi yn llsgr. *K* (Peniarth 40, a sgrifennwyd tua 1469; mae rhan o'r llsgr., ond nid y testun cyfraith, yn sgrifenu Lewis Glyn Cothi):

O *deruyd* i dyn dygedut nat yuo lladca6d, sef y6 y ueint o *kyureith*, kyhyt ac e6in i arianuys. (Peniarth 40, 170. 17)

Mae'r tudalen wedi'i staenio'n ddirwg â bustl, ac mae rhai llythrennau'n anodd eu darllen, ond mae'n bur sicr mai *arianuys* yw'r darlenniad cywir. Ceir rhyw ateg i hynny gan ddarlenniad llsgr. *Col* (o'r rhan nas argraffwyd yn *Llyfr Colan*):

¹ PRO E 101/62/18 (rhestri milwyr Calais), *Letters and Papers Foreign and Domestic, Henry VIII*, xv, t. 274. a PRO E 315/371-2 (trigolion Calais, 1556), lle mae 'John Davye' neu 'David' yn berchen ar 'The Moore' yng Nghalais.

² E. A. Lewis, *Early Chancery Proceedings concerning Wales* (Caerdydd, 1954), t. 115. Mae'r ddogfen yn anghyflawn ac yn anodd ei deall.

³ *Ibid.*, tt. 123-4. Eu gwrthwynebwyr oedd 'David and Harry ap John, John Lewis, Robert ap Rychard'. Ai tenantiaid Prys Mwtwn (Piers Mutton) oeddnt hwy, tybed?

Tynnodd Timothy Lewis sylw at y cymal hwn yn ei Ragymadrodd i LHD. (td. xiii); 'kyhyd a chogyn yr e6in ar yr y6dvys' yw 'meint y llacka6d' yn ôl y llsgr. honno (Llansteffan 116, 90. 25), ac 'ewin yr bys nessaf yr ba6t' a enwir yn llsgr. *D* (Peniarth 32, 183. 21). Gellir cymharu ag *arianfys* ac *efyddfys* y *goldfinger* sy'n digwydd mewn testunau cyfraith yn yr Hen Saesneg (*Æthelberht* 54. § 4 ac Alfred 59; F. L. Attenborough, *The Laws of the Earliest English Kings*, 10, 88), lle y mae'n glir oddi wrth leoliad y cymal yn rhestr gwerthoedd y bysedd mai 'bys y fodrwy' a olygir.

blwyddau

YN ÔL WG 206, 'the forms *blwyddau*, *blwyddi* for 'years' are pure fabrications', ac yn GPC 290c, o Febl 1588 y daw'r enghraifft gynharaf o *blwyddau*. Ond cofnodir enghraifft gynharach yn AL i. 202, n. 11, mewn amrywiad ar V.C. II. xxviii. 5; daw hon o llsgr. *K* (tua 1469), a dyma'r darlenniad llawn:

Or pan aner map yni uo xiiij o uluydeu i dylu uot 6rth noe y tat ai dat yn argl6yd arno. (Peniarth 40, 120. 14)

Mae hwn yn cyfateb i'r enghraifft gyntaf o *blwydd* yn GPC., Or pan anher mab yny uo pedeyr bluyd ardec, o LLDW. 70. 22 (tudalen a dynnwyd o llsgr. *E*, B.M. Add. 14931).

Aberystwyth

DAFYDD JENKINS

CYDFODAU O'R BYMTHEGFED GANRIF

CYHOEDDIR isod destunau cydfodau a wnaed rhwng amryw o ardaloedd yng Nghymru yn y bymthegfed ganrif.¹ Defnyddiwyd pedair llawysgrif. Y mae *A*, sef Peniarth 163 Rhan II, yn llawysgrif yn llaw Gruffudd Hir-aethog.² Gwnaed y gydfod hon, yn ôl Gruffudd Hir-aethog, yn ymyl Pont-gamarchrhwyng Llanandras, Gwerthrynion, Mortun, tri chwmwd Deuddwr, Powys, Swydd y Waun, Swydd y Dre-wen a Swydd Croesoswallt yn y flwyddyn 1406. Fe'i copiwyd o lyfr Edward ap Dafydd ab Edward yn 1548. Llawysgrif yn llaw Robert Vaughan yw *B*, sef Peniarth 271. Gwnaed y gydfod hon eto yn ymyl Pontgamarch gan Llanandras, Gwerthrynion, Mortun a thri chwmwd Deuddwr 'vi blenedd wedi rryfel Owain'. Y gydfod hon yw'r ddogfen gyntaf a geir yng nghyfrifol Robert Vaughan; ceir rhai defnyddiau eraill ac yna y nodyn: 'Hyd hyn allan o lyfr Dafydd ap Howel ap Madog wedy ei ysgrifennu yn deg ar bapir yn amser Edward IIII,

¹ Yr wyf yn ddiolchgar i'r Athro Thomas Jones, Mr. Dafydd Jenkins a Mr. Brynley Roberts am awgrymiadau gwerthfawr a gefais ganddynt wrth lunio'r erthygl hon.

² *RWM* i, t. 949.